

AMA DONZELLA DOLORETAKUAREN ZAZPI EZPATAK.

¡O zé oñazak, Jesus-en Ama,
Zeuben Biotzen erdian,
Simeon zarrak biyoi ezpatak
Aitatutziaz batian!...

¡O zéñ minduba, Ama, Josegaz
Jesús zenduban gordeko,
Ijito-alderonz gabaz igasi
Erodes-ek ez ilteko!...

¡O zéñ illuña Biotza eukazun,
Ama minduraz betial!
Iru eguntan uri guztian
Eziñ billaurik Semia!...

¿Nórk esan, Ama, zeure naigabe
Gogorrak, ikusitzian
Zure Semia Kurutze kargaz
Samintasungo kalian?...

¡Ama! ¿zelan irauñ, añbeste miñez
Kalbariyuan jeigiña,
Zeure Jainkoa zekusazula
Kurutze baten josita?....

¡O zé negarrak, Ama gozua!
¡O zé anpulu malkuak,
Kurutzeplan Gorputz illotza
Artzian zeure altzuak!...

¡O zé penia, Gorputz santua!
Obi barriyan ichirik!
Ama Donzella; gorde gagizuz
Beti graziyan bizirik.

Erregua.

¡Zazpi ezpata-miñez josiya,
Andra Donzella Maria!
Zeure *Jesus-en* eruapenaz,
Emon eiguzu grazia,
Artzeko beti pekatu danen
Damu guztizko aundia;
Bera maitetan igaro daigun
Geure bizitza guzia,
Zeu ta beragaz jaritsi arte
Zerubetako gloria.

BALBINO GARITA-ONANDIA-KOAK.